



INATISARTUT

Aningaasaqarnermut Akileraartarnermullu Naalakkersuisoq

Ulloq: 16. juni 2025
J.nr.: 01.31.06/25-01131

**Aningaasaqarnermut Akileraartarnermullu Ataatsimiititaliap marlunngornermi ulloq
10. juni 2025-mi aalajangiineranik Naalakkersuisunut ilisimatitsineq.**

**Nuummi erngup nukinganik nukissiorfiup allilerneqarnerani suliniutit ilaasa
aningaasalersorneqarnerat. Ataatsimiititaliap suliaa nr. 01.31.06/25-01131.**

”Naalakkersuisut inassutigaa,

- kontumi pingaarnermi 80.00.02. Inuiaqatigiit aningaasaqarneranut iluanaarutissanngorlugit aningaasaliissutit, suliniut nutaaq nr. 21.080 Nukissiornikkut attaveqaasersuutiniq nutarterineq, Nuuk, aningaasaliissutit 2025-mi 18,5 mio. koruuninik amerlineqassasut, aamma
- 2025-mut ilassutitut aningaasaliissutitut inatsisissatut siunnersuummi kontumut pingaarnermut 80.00.02. Inuiaqatigiit aningaasaqarneranut iluanaarutissanngorlugit aningaasaliissutit oqaasertaliussamik ilanngussisoqassasoq ilanngussaq 1 naapertorlugu.”

Aningaasaqarnermut Ataatsimiititaliap oqaaseqaatai apeqqutaalu

Apeqqut 1:

Nutarterinissat kissaatigineqartut Nuummi erngup nukinganik nukissiorfiup allilerneqarnissaanik suliniutip tamarmiusup ilagigai Naalakkersuisut isummernissaannut tunngavissiami allassimavoq. Suliniummik pilersitsinissamik kissaat matumani pineqartoq Inatsisartut inatsisaannut 2021-meersumut, Nuup kiisalu Qasigiannguit Aasiaallu pilersorneqarnerannut erngup nukinganik nukissiorfinnik taakkunungalut atatillugu atortunik sanaartornermut, aningaasalersuinerneq ingerlatsinermullu killiliussatut atugassarititaasut aalajangersarneqarnerannut, sooq ilanngunneqarsimannginnerneq paasissutissiissutigineqassasoq ataatsimiititaliamit kissaatigineqarpoq.

Kiisalu suliassaq matumani pineqartoq marlunnut avillugit aningaasaliissuteqartarnermut tunngavimmut, tassalu suliassap allaaserineqarneranut aningaasaliisarnermut, tamatumalu kingorna suliassaq ingerlanneqassappat sanaartornissamut aningaasaliisarnermut, qanoq eqquutsitsinnerneq paasissutissiissutigineqassasoq ataatsimiititaliamit kissaatigineqarpoq.

Apeqquut 2:

Ukioq manna januarimili Naalakkersuisut suliamik assingusumik nassiussisimasut ataatsimiititaliamit maluginiarneqarpoq. Kiisalu Utoqqarmiut Kangerluarsunnguanni erngup nukinganik nukissiorfik 2032-mi naammassineqarnermini atorluarneqalereersinnaaqqullugu nutarterinerit 2023-mit 2032-p tungaanut ingerlanneqassasut isummernissamut tunngavissiami allassimavoq.

Inatsisartut Naalakkersuisullu pillugit Inatsisartut inatsisaanni nr. 26-mi 18. november 2010-meersumi § 16, imm. 2 aalajangersagaq ataatsimiititaliamit innersuussutigineqassaaq.

Aalajangersagaq malillugu siunertanut aningaasanut inatsisip akuersissutigineqarnerani naatsorsuutigineqarsinnaasimanngitsut aningaasartuuteqarnissaq Inatsisartut sinnerlugit Aningaasaqarnermut Ataatsimiititaliamit akuerineqarsinnaapput.

Taamaattumillu nutarterinerit ilassutitut aningaasaliissuteqarnissamik qinnuteqaammi matumani kissaatigineqartut 2025-mut aningaasanut inatsisip akuersissutigineqarnerani naatsorsuutigineqarsinnaasimannginnersut paasissutissiissutigineqassasoq ataatsimiititaliamit kissaatigineqarpoq.

Apeqquut 3:

Inuiaqatigiit aningaasaqarnerannik misissueqqissaarnerup suliniutip immikkut innaallagissamut aqqusiilluni aqqusiinanilu CO2-mut aningaasartuutit ilanngunneqarneranni imminut akilersinnaanera takutikkaa isummernissamut tunngavissiap kalaallisoortani qupperneq 5-imi allassimavoq. Inernerusut CO2-mut aningaasartuutit ilanngullugit ilanngunnagillu takutinneqarnerat suliniutip inuiaqatigiit aningaasaqarnerannut kingunerisassaanik naliliinermut qanoq sunniuteqassanersoq itisilerneqassasoq ataatsimiititaliamit kissaatigineqarpoq.

Apeqquut 4:


Erngup nukinganik nukissiorfiit siuliani taaneqartut suliarineqarneranni killiffiup paasissutissiissutigineqarnissaa kiisalu akit qaffakkiartornerat erngup nukissiorfinnik suliniutit aningaasaqarnerannut maannangaaq sunniuteqalereernersut paasissutissiissutigineqassasoq ataatsimiititaliamit kissaatigineqarpoq.

Taamatuttaaq Nukissiorfinnut tunngatillugu pissutsinik allanik aningaasaqarnermut tunngasunik ataatsimiititaliamut paasissutissiissutigineqartariaqartunik peqarnersoq akissuteqarfigineqassasoq ataatsimiititaliamit kissaatigineqarpoq.

Aningaasaqarnermut Ataatsimiititaliap aalajangernera

Apeqquutit siuliani allassimasut akineqarnissaasa tungaannut Aningaasaqarnermut Akileraartarnermullu Ataatsimiititaliap isummernissani **kinguartippaa**.

Inussiarnersumik inuulluaqqusillunga



Erik Jensen

Aningaasaqarnermut Akileraartarnermullu Ataatsimiititaliap siulittaasua